

四庫全書

集部

欽定四庫全書

集部

莊渠遺書卷八

詳校官中書臣孫溶

中書臣劉源溥覆勘

總校官知縣臣繆

琪

校對官中書臣陸

湘

謄錄監生臣李崇實

欽定四庫全書

莊渠遺書卷八

明 魏校 撰

譜牒

莊渠李氏族屬譜序

孝弟也者本其所以生也爾身從何生也曰吾父母遺體也父安從生曰吾祖宗傳體也而忘之則其心死諸昆弟伯叔父何親也曰同胞也而忘之則其手足不仁然則子孫非曰吾有之也吾祖考散而成體也是故昆

弟之子猶子也一視同仁也先王教民仁其九族立愛自親上本高祖下逮於元孫而旁及諸父昆弟喪則五服以相戚也祭則紀之以小宗五世親盡而服窮矣而宗易矣而情何盡矣由親同姓以往懼其漸以疏遠也則大合族而統之以大宗故親者彌相親也而疏者雖百世猶相繼毋散校之立統宗譜以合大宗也則始祖以為主代上下相承無間也其道曰尊尊詳適而畧庶則又立族屬譜以厚吾小宗也而高祖為主矣前後

相附以互見也其道曰親親詳近而畧遠與統宗譜相錯前表莊渠始遷祖世系錄其自適而分著我自出也迺起自我高祖彥行府君而盡於吾之族昆弟圖成而五服之屬四世之宗咸萃焉油然而生其孝愛之心吾與族昆弟之子若孫生則附生則附親屬雖始竭而猶未忍相棄也子孫續為譜則遷祖考親盡者莫諸前復自其高祖始而改紀其親屬尊尊親親無窮也修譜必也告於大宗以統宗譜相質校復采耳目所覩聞談祖宗

時故事命曰世說子孫而聞之庶其音容若接矣乎嗚呼天地之大德曰生人也而弗念厥祖弗哀其父母劬勞自戕賊其心也昆弟而路人自痿痺其手足也是豈人之性也哉其無乃俗流夫與物欲迷與亦教之孝弟而已矣凡我族人其毋忘本哉

五服圖說

上殺

父斬哀三年

母齊哀三年

祖父母齊哀期

曾祖父母齊哀三月

高祖父母齊哀三月

下殺

父為長子斬哀三年

庶子齊哀期

孫大功九月

曾孫總麻三月

元孫總麻三月

旁殺

昆弟齊衰期

從父昆弟大功九月

從祖昆弟小功五月

族昆弟總麻三月

世叔父母齊衰期

從祖父母小功五月

族祖父母總麻三月

從祖祖父母小功五月

族祖祖父母總麻三月

族曾祖父母總麻三月

昆弟之子齊衰期

從父昆弟之子小功五月

從祖昆弟之子總麻三月

昆弟之孫小功五月

從父昆弟之孫緦麻三月

昆弟之曾孫緦麻三月

五世袒免為親同姓

六世而親屬始竭

父母至親也故喪三年至痛極也此喪禮之大綱五服因是以生矣父母之於子其痛同而庶子以尊加之故降而期則以降為正服而長子三年為加隆焉耳以傳

重也祖尊矣故自三年而期而孫以尊加之則為大功
適子死則適孫為祖承重三年故於適孫加隆為期也
曾高祖尊同而恩殺矣故不敢以大功小功服之而為
之齊衰則殺其數為三月也曾元孫總同不可加其月
數也此皆正統之親也昆弟一體也自吾父而推故期
從父昆弟自吾祖而推故大功從祖昆弟自吾曾祖而
推故小功族昆弟自吾高祖而推故總也世叔父自吾
祖而推當大功矣以吾父一體則加隆而為期其報服

與庶子同昆弟之子猶子也從祖父從祖祖父自吾曾祖而推也故小功族祖父族曾祖父皆自吾高祖而推也故緦而報服同以旁尊不可加之也此皆旁親也尊卑之體適庶之分親疏遠近之等恩義曲盡矣

祖系

一世祖諱茂實字實之二世祖譚吉甫生一子孟莊其一支為吾高祖恕世次為穆

我李宋南渡故家也建炎之初高宗棄汴來遷於杭時
則有編修府君者從而南寓吳封門為始遷祖其子官
至金紫光祿大夫於古為始興而世系不書者無徵也
故今定莊渠始遷祖為一世是為實之府君生元之初
宋滅而華夏稍變更矣其子吉甫府君生元盛時元徵
之不起後老矣及見元之亡而遇我太祖之興再立人
極宋遺民之孫復見聲明文物之盛矣

族屬圖

高祖

曾祖

祖

禰

昆弟

附圖

子

孫

已上見家乘

世說

我太祖遣大將軍徐達北定中原以次削平四海定有天下之號曰大明建元洪武越明年而吾高祖生自此天下太平矣享年八十有一卒正統十四年三月七日

是歲也先入寇土木之變英宗蒙塵高祖母金氏卒
景泰三年三月十日時景皇帝中興故君雖蒙塵而天
下不傾也

高祖彥行府君有馴行閭若與古符其孝友因心而發
生母袁病篤迫默禱於天祈以身代弗得遂刲股救母
弟信亦刲厥肱孝誠相通不謀自同乃煮糜粥食母母
病遂瘳兄弟創亦湔愈孝誠動天人罔間言鄉人至於
今猶然稱之曰二孝子也

高祖有子四人而吾曾祖行三出後崑山魏士珣族曾祖奕宗大生洪武三十二年時建文君在位傳至棠為繼高祖之宗與弟松今居郡城敏宗學贅荻溪王氏子孫今居荻溪生洪武三十五年是歲也而太宗靖內難聰宗文生永樂八年傳至權為繼曾祖之宗權父獻能道祖宗時故事高祖之後惟此一支居於莊渠

高祖與魏士珣同娶於金而士珣無子則育吾曾祖以誠府君為子魏故農家世積善得曾祖而家道日隆遂

為巨族士珣夫婦甚賴之後庶出有子而曾祖亦不復
歸宗

曾祖寬厚有德言貌溫溫聞人之過口終不忍言惟聞
人善則喜談之不置終身未嘗詈人雖甚觸忤之終不
恚怒但徐呼小郎則人皆不安曰爾奈何犯長者

吾蘇最爾地不能方二百里而財賦當天下少半郡城
繁華四方商旅輻輳過者嘖嘖羨富饒豈知鄉氓彫敝
其力穡者終歲勤動僅能還官樂歲尚咨寒饑遇凶歲

則餓莩滿野屍填於川錢糧自此虧額矣有司鞭撻血肉淋漓吾曾祖嘗舉為糧長積三十餘年專以誠長者處區民不忍一施鞭扑區民化其德終不忍逋負之至今稱為佛子家吾父亦嘗為糧長有祖風然區民漸貧不能無逋負者又三十年而民力憊甚歲率拖欠以為常有司督責糧長賠納多破家亡身矣嗚呼天子仁聖非大蠲賦無由活此一方民也

有惡少嘗不快於曾祖三放火來燬屋廬輒心怖而止

一日自首伏曾祖以酒肉勞之曰儂可罷休茲詎好事
其人感泣遂為善人

曾祖始居信義舊宅在真義浦東莊渠之族中哀而信
義興矣吾祖別治宅於浦之西信義之族亦惟我一支
為盛噫起家艱辛子孫詎能盡知邪曾祖生永樂七年
卒成化十一年十一月八日曾祖母顧氏生同年以成
化六年十月二十一日先卒是時國家全盛極矣然自
太宗遷都於燕控制形勢天下始奠安而吾東南困於

轉漕民力亦竭矣

曾祖族葬磚塲字圩與新宅鄰曾祖歿後人夢其騎從甚都呼曰上帝以我公直今為神矣

吾祖新婚適有訟事里媪咕囁私語曰新婦不祥曾祖母怒曰官事年注月定偶值婚期奈何作此離間語其賢明皆此類也

伯祖聞遠號一黠有大志魁傑人也其所交多一時豪傑有司強補邑弟子員治書經數舉進士不第以歲貢

授玉山訓導後世以尚書相傳遂為仕族生宣德四年
是時宣宗不親政而能屬任元老稱太平天子卒成化
二十三年八月十五日伯祖疾革則語家人曰速治我
後事吾且從上賓天是歲憲宗登遐

伯祖母沈氏好潔其所居室常自灑掃無纖塵

伯祖三子從伯父涇清伯號菊泉繼祖之宗貌清癯讀
書以詩鳴為鄉人師有祖孫三世受業者繼娶不慈一
哥庭椿游蕩死其子炤繼高祖之宗

淮清叔贅洪墟鍾氏幼有奇質父友見而異之曰是兒
清徹一似雪晴新月遙映梅花長乃嗜酒御童僕少恩
一夕大醉溺水從者援之遲遂咯黑血死時從伯母年
二十八矣鍾故富家父母既歿伯祖宦遠方尋卒於官
從伯母笄笄無倚族人利從伯母之改嫁也則稍蠶食
其產且盡從伯母讓之弗與爭晝夜紡績自給養其二
孤庭楠庭朴勤苦萬端屹弗改節弘治十四年卒享年
五十有一矣鄉人高其貞潔相率狀其行於有司奏請

旌表門閭以旌歿而寢校自幼則見吾從伯母面常有憂容目汪汪如淚流也慎默寡言與人言煦煦如恐傷之至其節操毅然人亦莫能奪也

庭朴五哥嘗學醫有老醫語之曰汝用心過不通也學醫先守常法正治不愈乃可從治汝今好奇不肯就病治病輒求隔二隔三治之此未學行先學走也

湘清夫贅吳涇胡氏子庭樗今居吳涇庭樟徙陽城村四面皆湖也伯祖之後多讀書能文而貧不振庭樟六

哥目不知書而敦篤異常家亦溫飽鄉人倪姓者以軍籍誣我伯祖往見清軍御史不屈則以大義質之其人震怒伯祖膝行而前曰昔者勾補軍伍惟恐平民不為軍今清理軍伍正恐平民為軍其人為之霽威伯祖復抗章奏於朝事竟得白子孫賴之

大父元律府君朴茂而長身言必謹慤作事必周詳喜怒不輕見於色子孫有過弗忍笞也召而敦戒諭之使愧而改下至臧獲亦不忍輕撻一人性勤儉昧與先家

衆興綜畫諸務夜則候人定徧視門戶局鑰乃就寢暇
靡他玩惟好觀書有得或忘寢食忙後常默坐移時休
養精神迪知衣食之艱難懇懇語子孫以耕織勞苦疏
衣糲食與衆同之少見紛華意輒不悅厭世俗之侈靡
也則有志淳古之風故自號朴隱也

吳固澤國也禹貢揚州厥土塗泥厥田下下國朝而田
賦登上上亦既竭澤而漁之矣而水利久廢莫之興也
吳人以水田為命歲數被灾大父意慘然不樂也乃講

求水利之學曰吳地邊高中下昔人象為盤盂不大決
其下流注之海則胡以止湖翻矣禹貢所謂三江既入
震澤底定者也今淞江全受震澤諸水實惟經流而中
多阻如腸胃病噎然西迤北地形愈卑則匯為陽城昆
承諸湖故有白茅塘受之以瀉於江而今塞矣此吾蘇
第一患也大父木訥不善文則數使人言於達官冀有
聞於上者弘治八年東南數大水孝宗命侍郎徐貫治
水於吳一時工程惟開白茅重大而有司者多文具勞

而無功大姓復有私崔葦之利陰持之者大父憾之終身正德十六年武宗命撫臣尚書李光嗣復治之白茅遂通其他水利亦未能盡興也

大父嘗嘆圩田窪下恃岸為防岸崩則禾蕩然滅矣必也大圩分小圩牢築岸脚使耐風浪

大父嘗嘆海口潮汐漲落易淤泥沙五代錢氏有土時設卒撩淺其法可迄今守也而廢也久矣

大父嘗嘆世衰則刑繁今新例充軍者日報也而曾不

足以禁頑而徒為貪酷吏舞文作威福也每誦張釋之
之言曰法者天下公共也今法如是更重之是法不信
於民也又誦戴胄之言曰敕者出於一時之喜怒法者
國家所以布大信於天下也則又嘆曰誰與以此言聞
於上者弘治十一年孝宗厭新例之冗瑣也則命羣臣
廷議舉要而刪其繁定為問刑條例大父猶恨一時大
臣不能將順上美惟守大明律以一民也

大父嘗謂縣丞簿最為親民矣而祿薄少自慎重宜增

俸以養其庶庶可為民造福也

大父嘗愛伊川格言自檢束則日就規矩注其下曰誠上達君子纔放肆則日就曠蕩注其下曰真下流小人命校書置屋壁以自儆

大母王氏外大父張仲侃魁傑士也獨奇愛大母曰此女吾自主之一日見大父撫其首而異焉遂以歸於我大母體貌豐碩凝重有威寡言笑每乘舟未嘗左右顧岸鼻頰一黑子宛如元珠被服惟布素雖敝尚整潔若

出於新壯歲即却環珥粉黛弗御大母性孝一夕天寒使婢以衣覆女孫則嘆曰人言母憶兒兒不憶母吾母在家而寒也誰以衣覆之哉

曾大母性嚴諸婦少有當其意者惟大母善事之能得其歡心

季父幼多病大母憐愛之異甚夜卧置之腹遺矢亦不移

大父偶失愛於伯祖大母聞之則治具延兄公呼二兒

使侍食焉伯祖感嘆曰吾聞兄弟之好以婦人敗未聞以婦人全也吾弟婦其賢矣哉

大父一日嘆內姪之子有所恨過之曰卑幼也而數犯我大母曰汝母族惟一息耳奈何不能寬容大父矍然稱善

大母嘗語吾子孫曰莊渠之族爾家本根也其勿忘大母嘗戒子孫鄉鄰與若平等勿以我富而驕勿以彼貧而憎

蘇氓困於重賦勢且不能聊生宣德初元有詔蠲重額
十之三而戶部格弗下蘇守况鍾則抗章以死爭得蠲
數十萬石大父嘗嘆曰微公吾民不活矣近歲詔有司
立廟以祀夏忠靖公原吉周文襄公忱大父嘆曰二公
廟食於吾土固當雖然必以况侯配校官刑曹每訊重
囚則大父輒見夢告戒之精爽若生

大母晚歲中風語多不慧而形益肥善飯以無齒不能
食也吾母則跪而哺之踰年遺矢則親抱持每自浣滌

大母且歿嘆曰吾溷汝多矣願汝子孫咸孝順汝君子
以比崔山南

大母以正德二年十月十五日卒越明年四月十三日
而大父卒時校在官畏法網不敢請告回也嗚呼痛哉
是時武宗不事事宦官劉瑾擅權毒痛四海又二年始
伏誅而法網解矣然羣小用事不衰也大父生宣德十
年享年七十有四臨終曰吾今獲考無所恨惟孫校在
官弗獲一見吾欲成為清白吏其以田三百畝廩之以

養廉

卷八

先君諱奎字孟文而人稱為竹泉翁短而豐下色溫體
舒性仁厚雖婦人孺子皆知其坦然無欲害人之心也
以校貴敕封南京刑部主事而吾母張氏封安人先君
生天順六年二月三日而大父夢文昌之星降精於家
是時英宗復辟聞處士吳與弼賢遣使往聘之至則以
為左諭德不拜復遣使送還與弼厲志聖賢為我朝學
者倡噫自有科舉而士彌賤若與弼可謂高鴻在寥廓

矣

先君未弱冠聞大父之在官而雨露服體盡濕也亟往代之而為塘長而為糧長大父得以佚老終身水利僉事伍姓者貪酷吏也而勤政然不辨淑慝每行縣則塘長駢首受杖有死者惟陸祥以重賄免而先君死而復甦他日又行縣大母哭語人曰長男昔代爺死裏得活今該少男代之雖然吾終不忍也先君聞而慰大母曰兒自往耳弟弱詎能受大杖邪是時幾再喪生校兒時

尚憶大父母欲觀杖瘡先君終不肯而私與四叔祖觀之則相持泣也譬若虎飮蓋將護三月纔愈伍動大眾開京口河先君與其役大父在家病危殆先君心忽悸動夜寐不安而家人至則紿曰老官有病今瘳矣先君哭曰是欲欺我勿回耳冒禁而逃晝伏夜行聞林木有聲則驚以為虎也蒲伏不敢動良久乃行還家而大父適以是日愈復往終役故敕詞褒先君云孝感有徵義聲無忝蓋指茲事也

大父仁慈雖甚愛先君而先君孝謹奉之若嚴朝廷嘗一夕大醉扶歸從者曰及門矣則蹶然醒見大父言動無少差退入室則惛醉如初也

先君未營居室先立祠堂其制前為同堂而分其後以為四室祠位各奠於室由禰而上皆得南向而有常尊祭位同享於堂自曾祖而下各統於尊而暫屈歲時奉祀惟謹祝文則用御製教民者世俗童僕從其主姓先君各因其本姓以為稱曰吾今不奪人姓他日亦免混

亂吾姓也

正德九年校之召為職方郎中也則語先君曰今邊帥握重兵隨上居大內而藩王有反謀兒義不可出也先君曰汝內自斷勿謀諸人親戚聞而交勸我多事矣自是移疾不出者八年中間嘗有召命時宰議處校於銓曹先君意不能無動一日聞上私出遊幸則大駭為之隱憂語校曰古今詎有是事汝當藏修遂初志耳校官南曹頗名執法人有謀干先君以撓之者至則聞其名

卒不敢嗚呼校之出處辭受實先君有以全之也

吾家由先世以來未嘗有亭沼也而校之移疾而歸先君特築精舍前為小亭臨池曰汝可濯纓於斯矣其後土屋數椽因其舊亦蔭以花木使成陰曰汝可游焉息焉於斯矣則又語校曰家務勿以經心也吾自主之吾欲汝惟志其遠者大者焉耳鄉人二三子來學則館穀之四方朋友有至者則歎曰吾以為書院也而田舍也何以歎蓋歎其村樸有古風也而校則語之曰此侈於

陋巷矣亦嘗出戶觀野乎天文四垂為宇六合一家觀
生意於苑囿臺池間也則已蹙矣乃相與歎先君之儉
德曰遠矣哉

先君好賓客人見其時而豐也而莫知其恒於儉也自
奉澹薄如大父時人或弗之見矣而先君則歎曰昔者
吾也逮事父母得一甘脆未嘗以與吾口則持而進之
二親今而子孫以奉我噫吾何忍嘗則度以待賓客
先君治家亦既勤只而人未嘗見其勞也蓋事有漸次

使人各程其能武宗崩年而校為典學使者將行先君與吾母戒曰嗟吾兒嗟吾兒汝母以已長格人母以求備取士教則莫如寬矣他日聞校罷斥學官之不職者則寓書曰兒亦知夫師儒之清貧乎而弗恤之而徒責之使砥行也人得無弗堪乎

先君鄉飲一嘗為賓退而泣也先君之泣蓋傷大父昔者鄉飲旅於衆賓而今顧居上也

嘉靖元年以上母后徽號恩而先君與吾母賜四品服

越明年五月十日先君卒於家不肖校督學嶺南弗獲
永訣終天之痛尚忍言哉葬長洲陽山之中麓卒之明
年而大禮之議起徽號三易乃定

嶺南陳激衷有道之士也一見先君歎曰吾閱士多矣
若太公厚德君子哉先君既終校門下二三子各為叙
述其言不同而稱厚德則同

先兄子賢面常帶笑容天性樂易平生無怨惡於一人
胃氣積傷於酒煎熬真陰多飲而少食竟以噎亡

先兄不事事而竭力為鄉人捍災歲大雨且傷稼則先
馳會鄉父老與謀曰事急矣尅水必以土某涇口可壩
為堰以遏水衝某圩岸善潰則為之增高倍薄某處可
立大朋車戽水某家速辦船載乾土用也量地遠近及
田之多寡以起役夫曰先從吾家始則為立期會定賞
罰奔走督責不憚塗泥人有持酒勸之者則卻而弗受
曰吾今何忍沾唇事成復酣飲口不言勞一日聞校與
客講學則語校曰吾為汝一言而終收其放心而已矣

我乃放而不知求聞論孫吳兵法曰是謂多詐勝少詐耳

先兄一日以事過里人其人出不遜語甚倨也先兄默念此改常矣則以善言慰之是夕其人暴死使當時小有忿言則難至若掇矣先兄娶顧氏以產厄死時正德十有三年越明年寧王反罪人得而武宗南征天下洶洶又二年武宗病彌留而今上入嗣大統社稷幾危而安天也

季父橘泉翁字仲文長身而目微露幼多病不慧長而精悍嚴明嘗學醫善切脉理前知人死生已而棄去則專治生埒於封君後乃為府醫學正科待缺未上也生天順八年是歲英宗崩而憲宗嗣位我朝宦官之禍始於太宗而成於英宗晚年益明習天下事內侍不能大欺也君臣不相親自憲宗始然能久任大臣天下以寧國初重薦舉天順而後始以資格拘矣校嘗歎後世科舉也取士資格也用人而文法也制吏治四海所由困

窮也以吾季父之材能有如舉為農師寬假約束使盡地利於北方則其利民豈淺鮮哉校嘗語季父曰我國家北都燕而遠漕江南粟非計也則莫若修舉虞集遺策矣曰集之策何如曰京師瀕海萑葦之場也集請如浙東捍潮法化鹵地為桑田募富民使闢土能以千夫耕者授以千戶以萬夫耕者授以萬戶功成則世襲以官季父笑曰我多多益辦耳季父娶趙氏宋宗室之後也

嘉靖九年校致政以九月朏還家而季父以八月十九日前卒後十一月二十三日而兄卒嗚呼痛哉是歲也而上更定大祀禮后出北郊親蠶罷孔子王爵

四叔祖行節魁首巨腹形短而肥少時嘗一賭博曾大父召而戒之則歎曰人非草木過不能改是我非夫遂終身絕賭性寬厚家人侈衣食旁竊利孔弗訶也坐是先富而後貧則鬱鬱不得志而病風痺言笑常如哭聲卒弘治十五年時孝宗清明有志圖治而天奪之速噫

此我朝治忽大機也

外王父張叟諱澤世農家而外王母曰季姥外王父生而樸愚自少出贅季之族人以其無聞知也百方侮之以為笑樂有勞役則曰汝往尸之仵仵終日未嘗憚煩官府有所誅求則曰汝往應命至則受夏楚而歸未嘗疾怨外王父惟一拙誠自居而季之族人久自慙負不復施其巧知君子曰張叟年既耄耄而德如嬰兒庶幾哉無懷氏之民與人人如叟刑可措也外王母貞順慈

良孝敬勤儉外婉而中慧通詩書謹禮度內外宗戚咸
尊事之下至婢妾亦樂其德來則相率懽迎去則戀戀
不忍相捨也吾母能言矣聞人談外王父短長退而以
告外王母驚曰兒莫如是此之謂學舌故吾母於終身
於人是非耳雖得聞口不復道也吾母能食矣外王母
之王母與他兒食而不以及吾母退而以告外王母驚
曰兒莫如是此之謂爭食故吾母終身甘澹薄於飲食
未嘗有所揀擇也嗟乎以外王父之慤與外王母之賢

而善教也而所生子多不類天其萃美於吾母乎而吾母之生也外王母之王父驚喜告人曰兒女子大有福德

詩

鼻祖道上世之事也吾家聚族莊渠尊實之為始遷祖矣乃始祖則力田質樸有古風顧氏妣以貞德開厥先二世祖吉甫惇行孝弟迪子孫讀古人書彬彬為文獻家矣

古我鼻祖始基莊渠於璞未鑿於醇未漓渾渾一脉匪
且今且

繫先妣顧壯歲而嫠嫗育二雛遐日奮飛擲如何其逢
天百罹其究如之何百福是釐

徵君吉甫玉爾溫如戀戀母慈兄弟于于和氣盈門厥
慶乃餘

鼻祖三章二章章六句一章章八句

呼天孝子情迫也高祖篤孝母病祈以身代弗得遂割

股救母弟信亦刲厥肱母食之遄愈孝誠動天也

兒呼天兮天高弗聞母氏誠死我何用生

兒呼父兮父不我應母生獲延遑恤我命

呼天二章章四句

萬石長者恤民也吾蘇賦於民重矣罷不能償有司誅
求急曾祖長區賦三十餘年寧自受責不忍鞭撻一人
人亦不忍逋負之既歿如失慈母

縣官召翁汝督萬石汝辦弗前死不償責

翁退慰民汝勤罔佚樂輸奉公世忠於國
翁顛以泣汝勞實多輸租已畢室中嗚嗚
民各前喏儂忍累翁我儉我勤我聊自充

萬石四章章四句

烏婦孝事姑也大母病風痺善飯不能自食吾母蒲伏
哺之大母益充肥吾母抱扶不勝其重遺矢則親滌除
勞甚弗敢自愛也大母語不慧然德吾母不忘每嘆曰
吾命恃汝願天好還子孫多多孝汝

老我齒齲兮我腹長鳴偃汝哺我兮死我復生

老我齒齲兮我胃長虛偃汝哺我兮我瘠而肥

人啞笑吾老兒呱呱我謂冢婦人中之烏

汝孝天知天胡然報之予叫天以祈曰有子如烏曰有
孫如烏曰孝且多

烏四章三章章四句一章章六句

王氏錢氏二譜附

高墟王氏族譜序

校大母王淑人出自高墟以賢德來興吾家自信義至
於高墟數里而近逮今歲時往來猶之東西隣也高墟
之氓力耕而好酒其始戶口阜殷今耗焉散矣校童子
時識其處宦游而歸問其室廬皆已易主惟王氏故居
獨存然多以酒病暴死校乃拊心歎曰吾蘇固彈丸地
也而財賦上供居天下少半民竭力且不支矧重之以
酒禍邪其母諉曰大政使然矣大母有姪春每過余輒
醉醉則大呼曰若可為我譜以毋忘吾姑校惟王氏得

姓遠矣則未知姬姓之王與媯姓之王與其居於吳則未知晉東渡者與宋南渡者與文獻一無可徵所可知者我太祖再造華夏乃洪武三年智凱占籍為民越明年戶部家給一帖紙敝尚存後之人其有興乎文獻之可徵莫大於是矣古者治道各從其祗是故大司徒掌人民之版土地之圖我太祖令民版籍為定其政默與古合大司徒夫家之法實寓教養其中智凱編戶時少未有室其父福三無恙年猶未艾也有司者舍父而以

其子母乃以教化為迂邪校今考論世次定以福三為
王氏始祖且勸之以孝弟力田母荒於酒申之以孝弟
之義曰哀哀父母至尊至親祖宗何人吾父所自生昆
弟何人吾父之所生族昆弟何人吾祖之所生吾弗敬
所尊自絕吾本根吾弗愛所親骨肉塗之人一樹千百
枝葉葉落歸根

一世 二世 三世 四世 五世

六世 七世 八世 九世

按帖智凱父福三母閭逮事大母徐四口之家田不能
十畝井地之法行福三當始受田至曾孫珪為餘夫生
子乃別受田珪字廷佩校兒時及見王太公長而髯偉
如也取牆裏張生一子四女長女為吾大母外王父張
仲侃魁傑人也奇愛吾大母曰此女吾自主之一見吾
大父謂有福德故以歸於我大母已嫁而孝不衰於父
母故施及其子孫春嘗暴富有司攀為糧長幾破其家
禮不下庶人小宗之法固通於民間也春為繼祖之宗

而其宗之者鮮景繼高祖之宗也而宗之者亦鮮古人有言曰余寡兄弟而不忍也骨肉有幾其交相愛哉

題吳越錢氏世譜

會稽錢某氏吳越武肅王二十一世孫也視余以文僖公所修大宗譜因流光譜而增述之者也文僖而後則其子孫所續書然亦久廢莫之修矣武肅暴貴傳國且百年唐衰而建邦宋興而納土大有功德於生民異於夥涉之為王沉沉者非神明之胄詎克爾邪流光譜撰

次世本起於帝軒轅氏代相承也其道千古若今日事
乃無復闕有間者某余所能知矣而某真為武肅苗裔
於越人戶知之我太祖嘗錫其家以銀圖書曰忠孝子
孫今某寶藏惟謹天語褒嘉為龍為光逾於上世所受
玉冊矣一作何啻九鼎大呂某之父暉舉弘治己未進士以文行
知名恒緘一篋固甚病革屬其妻曰吾子克肖乃授之
勿輕也其後某長矣請於母欲觀之其母賢母也曰而
謂篋中有物乎而父好施而不輕取瓶常無粟贏詎有

金此必上世典籍也某固請之發篋乃流光大宗二譜也今兩浙之錢咸祖武肅相與通族然莫能通譜者多矣某問余譜法余嘉其孝行乃告以大義人本乎祖其初一身也分而千百其身骨肉同也古之人尊祖故敬宗敬宗故收族聯其骨肉使毋散也夫譜何為也哉所以尊祖敬宗而大合族油然而生其孝友之心也非以夸美於人也非吾祖宗也謂吾所自出也微而冒他人之顯者是棄吾祖宗也其不孝上通於天矣非吾祖宗之

子孫也謂他人顯而強攀附他人亦謂吾顯推而附吾是誣吾祖宗也其不孝亦上通於天矣譜法無他信以傳信著以傳著而疑以闕疑其屬者乎有削而無筆

錢氏受姓考

錢氏受姓謂本諸彭祖帝軒轅之苗裔曰陸終世為火正有子六人後皆為顯諸侯彭祖其三也此錢氏所從出之祖也彭祖之苗裔曰孚仕周為泉府因官為氏此錢氏所從受姓之祖也然莫知其為彭祖何別相傳在

周之時而莫知在何王之世矣譜稱孚親彭祖之二十
八子蓋彭祖生陶唐以前而孚生於周曠千有餘歲而
父子相繼乎斯已疏矣古者官有世功則有官族泉府
士也於法不得賜氏豈自庶府登於大寮與或曰私氏
也史不云乎居官者長子孫因以為氏今庫氏倉氏古
倉庫吏之後也泉謠而為錢亦莫知何時錢讀若翦田
器也詩云庠乃錢鑄國語周景王鑄大錢則其謠也久
矣後世以錢代泉而全琮之後因居南陽白水乃更其

姓為泉其質亂有如此者謂白水為泉此自漢以後語耳古未有之也或曰錢彭祖姓也其名鏗或曰錢其名也後之人乃去竹而為錢夫錢俗書也古未之有也而古之人乃以為姓若名乎其下俚有如此者戰國有處士丹秦有御史大夫產此錢氏之始著見於史者也產子孫居下邳漢有廣陵守讓避王莽亂徙居烏程此錢氏始遷江東之祖也其在六朝晉有青州刺史端宋有太史令樂之然錢自得姓以來亦越至於武肅始大著

所謂龍虎變化不測魁傑人者非邪

世系

古武肅王化家為國暨於忠懿王讓國以為家余謂某
不宜混之於大宗譜某曰公有命我敢不從雖然未知
此若言何謂也曰君臣禮異然則若之何曰周禮有之
當奠其世系余讀太史公世表其猶有三代譜歷之遺
法乎師其意可也余遂言曰大宗小宗者卿大夫之禮
也援以斷國論則是未知大人世及以為禮也正統旁

支者天子諸侯之禮也比而同之於有家則是使族人
得以戚戚君也雖然則又有難者某曰此若言又何謂
也曰適庶有定分吳越有國與五季相始終立子以賢
不以長其舉常在於支得毋紊正統乎若為別之請問
曰貴命世治則定於立適世亂則擇而舉賢權以達經
者也變而不失其正國是以昌禮封君不臣諸父昆弟
封君之子不臣諸父昆弟則臣之矣雖適長也不得
嗣為君則固臣於今君矣其視支庶均之為別子也宜

各為圖附麗於後俾無干國統

大宗譜

封建滅井地裂細人無世業以活其大人乎無世祿以
養而宗嗣乃輟是故國無世臣家無禮俗王澤易竭宋
天子褒大忠懿王之烈與國同休世世官其子孫勿絕
噫斯其世祿之遺意乎余語某繇忠懿王而下世系不
可復列當為大宗譜以合族之人如領斯裳挈其法取
諸蘇氏而世自為處也父子也別以著代也兄弟也合

以連帶也其曰適子某庶子某者於禮未盡愜今更之曰繼子某庶子某別子為祖大宗以繼別小宗以繼支孽語在宗法中在古魯有展氏亦越有柳下氏晉有荀氏亦越有知氏有輔氏皆支庶興為大夫於別之中又自為別者也忠懿之季惟演以文章為翰林學士官至使相是為文僖公仁宗降帝子嬪於文僖之孫景臻拜駙馬都尉生也封公死也封王於是大長公主老矣從高宗南渡賜第天台諸若此者在禮皆當尊而為別或曰貴莫崇於王公胡

以弗比古諸侯表其世系而乃下與卿大夫絜曰古今禮不相襲宋因唐制封建祇寄空名焉耳爵則有列土田實未有徹周禮內諸侯祿也外諸侯嗣也匪直邦君族人其將為之服斬乎無亦主於齊衰三月是故事貴正名名必與實協

宗法

大宗小宗圖

大宗別子為祖繼別為宗百世不遷

宗子統族人主始祖廟祭族人服之齊衰三月

小宗祖遷於上宗易於下五世親盡則遷

繼禰之小宗統其昆弟其相為服齊衰期年

繼祖之小宗統其從父昆弟其相為服大功九月

繼曾祖之小宗統其從祖昆弟其相為服小功五月

繼高祖之小宗統其族昆弟其相為服緦麻三月至玄

孫之子親盡則遷

愚按古者國於天地有與立焉是故並建親賢爰有世臣舊族禮家所稱別子者公子不敢上禰先君自我作

祖別於尊也始興者亦稱別子自今起家別於舊也別子立廟百世不遷謂之太祖其繼別子者世為大宗統治族人君道焉為之服齊衰三月尊之如君也封建廢天下無世家矣而宗法亦因以亡合族羣居勢當有所統壹古猶今也禮可義起謂宜推本始祖一人世存墓祭放古之別子其世適放古繼別之宗族人雖不敢為服固當以所事大宗者事之乃若今制有爵延及後嗣者自當復古大宗之法

宗譜

嗚呼宋社之屋也已久矣我太祖肇立人極遺民之子
始即於奠安余謂某宋既隕姓錢亦陪氏爾後不可為
大宗譜矣然則若何曰為宗譜可也而其法則取於歐
陽氏繇高祖逮於元孫每五世則一更端也乃元孫復
為高祖以各綴其所生而禪於無窮期父子相仍兄弟
聯次族之親疏咸在也而無失其倫親屬有服者各相
邇也大宗小宗隱隱其中形分而氣連末異而本同余

語某聞汝之先自台而遷其處者實惟太宗君道存焉
上世鐵券猶在也我太祖大封功臣嘗取以為式某今
雖不敢以庶民為君之服服之乃其祇事之禮古今一
也宜亟通譜歲恒往來若也生不相聞死不相弔愬如
行路之人矣所貴乎故家者謂其能惇孝弟也不邪謂
其能崇禮讓也不邪然而弗大合族則是弗敬宗也弗
能敬宗則是弗尊祖也無祖則是無天也水倍原而流
竭木附榦而扶疏尚其念哉

五服圖

上殺

父斬哀三年

母齊哀三年

祖父母齊哀期

曾祖父母齊哀三月

高祖父母齊哀三月

下殺

父為長子斬哀三年

庶子齊哀期

孫大功九月

曾孫緦麻三月

元孫緦麻三月

旁殺

昆弟齊哀期

從父昆弟大功九月

從祖昆弟小功五月

族昆弟總麻三月

世叔父母齊衰期

從祖父母小功五月

族祖父母總麻三月

從祖祖父母小功五月

族祖祖父母總麻三月

族曾祖父母總麻三月

昆弟之子齊衰期

從父昆弟之子小功五月

從祖昆弟之子緦麻三月

從弟之孫小功五月

從父昆弟之孫緦麻三月

昆弟之曾孫緦麻三月

五世袒免為親同姓

六世而親族始竭

父母至親也故喪三年至痛極也此喪禮之大綱五服因是以生矣父母之於子其痛同而庶子以尊加之故降而期則以降為正服而長子三年為加隆焉耳以傳重也祖尊矣故自三年而期而孫以尊加之則為大功適子死則適孫為祖承重三年故於適孫加隆為期也曾高祖尊同而恩殺矣故不以大功小功服之而為之齊衰則殺其數為三月也曾元孫總同不可加其月數也此皆正統之親也昆弟一體也自吾父而推故期從

父昆弟自吾祖而推故大功從祖昆弟自吾曾祖而推故小功族昆弟自吾高祖而推故總也世叔父自吾祖而推當大功矣以吾父一體則加隆而為期其報服與庶子同昆弟之子猶子也從祖父從祖祖父自吾曾祖而推也故小功族祖父族祖祖父族曾祖父皆自吾高祖而推也故總而報服同以旁尊不可加之也此皆旁親也尊卑之體適庶之分親疏遠近之等恩義曲盡矣

第宅志

作室以傳子孫古人所謂歌於斯哭於斯聚國族於斯
非邪然其興也廢也大命在天小命在人其永命存乎
積德矣志第宅以毋忘祖宗之舊陳思王角吟云起家
難難難難保家難難難難可以一咏三嘅其徙而之他
者亦附見焉雖別散分離庶幾哉猶可復聚也

丘墓志

古者成民之事陵為之終志丘墓以系孝子慈孫之思
嗟乎爾身何出祖考遺脉體魄攸藏其曷忍忘


科第表

古者鄉舉里選尚矣自有科舉也士始輕雖則云然士
匪此則無以入仕顯親報君樹功揚名胥此塗出作科
第表噫鳳凰翔於千仞兮覽德輝而後下自應不在此

恩澤表

宋以忠厚禮其大夫士大夫士亦忠厚以成風錢氏與
宋一代相為始終其受天寵至渥也當時見謂忠孝子
孫作恩澤表以為世勸其受恩於異代者悉書天寵一

也



莊渠遺書卷八